

Bukan sekadar mengajar di bilik darjah...



BERJINAK-JINAK MENGAJAR: Cik Insyirah (*menghadap kamera*) menyemai minat dalam mengajar sejak kecil lagi. Dengan menyertai program AAM di Madrasah Alsagoff, beliau berpeluang mengalami kehidupan sebagai seorang guru dan menggilap kemahiran dan nilai dalam bidang pengajaran.

SEBELUM memulakan pengajiannya dalam bidang seni bina di Universiti Nasional Singapura (NUS), Cik Insyirah Imran menyimpan hasrat ingin menyertai kegiatan kokurikular (CCA) atau program yang memberinya peluang berbakti kepada masyarakat.

Justeru, apabila seorang teman menghampirinya pada awal 2015 dan mengesyorkan beliau melibatkan diri dalam program kesukarelawanan *Aspire and Achieve through Mentorship (AAM)* di Madrasah Alsagoff Al-Arabiah – yang dijalankan setiap Sabtu – Cik Insyirah tidak teragak-agak menyahut peluang tersebut.

AAM merupakan program mentor kesukarelawanan yang dijalankan saban minggu dengan tujuan membantu madrasah tempatan den-

gan bantuan mentor, sesi pembelajaran serta keperluan di dalam kelas seperti kertas kerja dan bahan rujukan lain.

Usaha tersebut demi mempersiapkan pelajar madrasah menangani peperiksaan nasional seperti Peperiksaan Tamat Sekolah Rendah (PSLE) dan Peperiksaan GCE peringkat 'O'.

Kini, setiap pagi Sabtu Cik Insyirah diluankan di Madrasah Alsagoff Al-Arabiah – mengajar matematik kepada murid darjah enam di sana.

Dalam jangka masa dua tahun bergiat dalam AAM, Cik Insyirah, 22 tahun, akur menimba pelbagai pengalaman dan kenangan manis.

“Pernah sekali seorang pelajar saya mengalami tekanan dalam salah satu sesi bimbingan. Dia tidak dapat menjawab sebarang soalan

yang diajukan dan tidak boleh memberikan tumpuan pada pelajaran.

“Walaupun dia pelajar yang bijak, malangnya dia tidak sedar akan kebolehannya. Sebagai mentor pula tugas saya bukan sekadar mendidik, sebaliknya cuba memberi motivasi dan memperbetul pemikiran mereka yang salah... apa yang dianggap mustahil sebenarnya sesuatu yang mampu dicapainya.”

Menurut Cik Insyirah, AAM bukan sekadar wadah berbakti kepada masyarakat, malah pengalaman beliau sebagai mentor banyak mempengaruhi dirinya sendiri.

“Sejak kecil lagi saya menyemai minat dalam mengajar. Dengan menyertai program AAM ini, saya berpeluang mengalami kehidupan sebagai seorang guru dan menggilap kemahiran dan nilai dalam bidang pendidikan,” katanya.